

Rediidx Nani Bacuaa Juan Xcuent Recos Ni Churu Gac

Baluiloj Jesucrist lo Juan

¹ Dee najc rediidx ni badeed Dios loj Jesucrist te gu-luilojnini loj rexmosni, xcuent recos nani di gaclaa gac. Jesucrist baxhal xanglni lo Juan, te baluiini guiraa re-cosga lojni. ² Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuilojpacni.

³ Chicbaa renani roj guijtze xcuent recos ni churu gac, renani riuza rediidxga, renani rguchee rediidxga neṅ lastooni sa'csi siäddzungajxh redxej che soob rediidxga.

Juan cagucuaa guijtza lo gajdz guidoo

⁴ Narä nacä Juan. Cagucuaä guijtze loj guigajdz reguidoo ni tre' lo región Asia. Dios guspalajz la'tu, guscuecdxini lajtzu, lagajc Dios ni sigajc najc nadxej, sigajcza gujcnii nani, sigajcza sajcnii par tejpas. Xca'zatu xcälruspalajz naj xcälrbexilajz guigajdz respit ni suga' guideb gabi cadro rnibeeni, ⁵ naj xcälruspalajz, xcälrbexilajz Jesucrist nani gunilii diidx ni badeed Dios lojni, nani ganiddoo gubansac lo rebengut, nani rnibeeza lo guiraa rereii loj guedxliujre. Laani sanälazduxhni nuure, laani rudzucajni xtojlnu con xtiejnii. ⁶ Laani bejnii gacnu te beṅro, te guedxro, gaczanu bixhojz lo Dios Xtadni. Suchä'p xpala'nii, suga'pni yälrnibee par tejpas. Sugacni si'c.

⁷ ¡Colgacbee! Laani sibisacni lo rexcäy, luxh guiragajc rebejn suhüii lojni, nägajc renani gudzujd cuä' xcustiini.

Guiraa rebejn̄ guedxliujre soon xcuentni. Si'cti, sugacni si'c.

⁸ —Narä nacä ganid, nacäza lult, si'c najc reletr A con Z —rnii Dad Dios—. Nabanä nadxej, sigajcza gubanä naii, sigajcza sibanä par tejpas, dipacna gacä ste'ca. Rapä yäl̄rnibeduxhru lo chutis.

Bahuiä loj Jesucrist lo xcäl̄rdimbicha'ni

⁹ Narä, Juan, bejtztu, näjza ni cadednäjt̄u trabajw xcuent Jesucrist, ni riunäjzatu cadre rnibee Dios, ni rsi-udzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhal̄reni narä pres sa'csi basule'ä xtidx Dios näjza diidx xcuent ni bejn̄ Jesucrist lo guedxliujre. ¹⁰ Te dumingw, laḷ ni cayunää Dios, guzacä astoo canixcalä, dina niacbeä caro yu'ä, dxejcti nez detzä biejn̄ diagä xse' te ni gunii dipduxh, astoo te trompet, ¹¹ najni loä:

—Narä nacä ganiddoo, nacäza lult. Lo te guitro bacuaa nani fiilu, dxejcti baxhal̄ guijtzga loj guigajdz guidoo ni yu' nez Asia, neḹ reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

¹² Dxejc gubireä te bahuiä chuni'c canii loä. Che gubireä bahuiä lo gajdz gandilier oor. ¹³ Galäii guigajdz recandilieerga, suga' te ni najc Xi'n Dios nani gujc Xi'n Niguii, najcwni te lajd ni rdzujn̄ lo ni'lini, lastoozani naliib te cinturon̄ gulajg ni najc ganaxduj oor. ¹⁴ Yejcni näjza xquidxejcn̄i najczareni nolbäj si'c xquichlajd xiil, nolbäj si'c yejg. Dxejcru rbebajl lojni. ¹⁵ Ni'ni rdimbicha' si'c guiib ni laa bronz che cayejcni lo guiboo. Xse'ni riejn̄ nadipduxh astoo che riäj̄t̄ nisro neḹ regueuu. ¹⁶ Ladbee ca' ḡaani gajdz balxhaguibaa; ro'ni rii te espaad ni guiro'p laad caj ro'ni; dxejctiru lojni rujn̄ si'c rujn̄ loj gubijdx che cagusanijni guideb lagaa.

¹⁷ Che bahuiä lojni, biabrloä nez lojni si'c te bengut. Dxejcti batzuubni ñaani xladbeeni yecä, dxejc guniini loä, najni:

—Na'c guidxejblu, narä nacä ni gubajñ galooli, narä nacäza ni guibajñ lult. ¹⁸ Narä nacä ni nabajñpac; gutä, niluxh ñaj nabanä par tejpas. Rapä yälrnibee lo yälgujt näjza lo gabijl. ¹⁹ Ni'cni bacuaa recos ni abahuiilu, nani cayajc ñaj, näjza nani churu gac. ²⁰ Dee najc laa yälxhiga'tz xten regajdz balxhaguibaa ni bahuiilu lo ñää ladbee näjza regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

2

Rediidx nani chää loj rexpejn guidoo Éfeso

¹ Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa ñaani ladbee, näjza nani rsiaj galäii guigajdz gandilier oor, rnii rediidxre lojtu: ² Narä numbeä xhi redzuun rujntu, xhi trabajw rdejtdtu rujntu dzuunga, näjza xho rsiudzu'tztu. Dizatu guchagsa'tu beñlatsiaj; näjza bala'tztu xho rujn rebejn nani rniireni najcreni apost ni rnii xtidx Dios, luxh direni gac, luxh la'tu gucbegajctu cagusgueereni bejn. ³ Rsiudzu'tztu, rujntu huant xcuent xtidxä, gajdtu guidxaj. ⁴ Empac yu' te quej ni rbe'cä xcuenttu: dirutu chanälajz narä si'cni huinälajztu narä ganiddoo. ⁵ Ni'cni colguzaa lajztu caro banijttu, colgusiejch lajztu, colyejn lagajc redzuun ni bejntu galoo che guslojtu huililajztu xtidxä. Palga ditu gusiechlajztu, sudzucaä xcandilieertu cadre suga'ni. ⁶ Laaca rujntu rbälaztu xtzuun rebejn ni laa nicolaítas, sa'csi näjza narä rbixlazä xtzuunreni. ⁷ Nani yu' diajgni te cuadiajgni diidx, sucuadiajgni diidx ni rnii Sprit Dxan

xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yäl**nabajñ**, ni yu' xhaguibaa cadro yu' Dios.”

Rediidx ni rniini loj rexpejñ guidoo ni yu' Esmirna

⁸ Dxejcti najni loä:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubansacni par tejpas, rnii diidxre lojtu: ⁹ Narä nanä xho cadejdlu trabajw, nanäza guxilii rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejñ Israel, luxh direni gac. Najcreni xpejñ xquidobäz beñdxab. ¹⁰ Na'c guidxeyblu trabajw nani agojl tedlu. Aree beñdxab gusal gaii sa'tu neñ latzguiib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yäl**nabajñ**. ¹¹ Nani rlajz cuadiajg diidx sucuadiajgni diidx ni rnii Sprit Dxan xten Dios loj reguidoo: nani gun gaan lo dojl, xhet gundi yälgujt ni rojpga lojni.”

Rediidx ni rniini lo rexpejñ guidoo ni yu' Pérgamo

¹² Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rnii rediidxre lojtu: ¹³ Narä nanä caro rbäjztu, rbäjztu lo guejdx cadro rnibee Beñdxab. Rsiudzu'tztu xcuent xtidxä. Laltis rsiudzu'tztu rililajztu xtidxä, mase neñ redxey cheni bagu'treni Antipas, ni gunii diidx xcuenta, nani gusudzutzpac nez loä, nani bagu'treni neñ guejdx cadro rnibee Beñdxab. ¹⁴ Niluxh yu' tiop-choñ xtojltu. Lojtu nadxaag gaii bejñ ni rujn si'c bejñ toBalaam agujc xchero. Laani baseedni Balac xho gunni te jiajb rexpejñ Israel neñ dojl, baseednireni gaureni recos ni gurej lo dxan

nez loj rebanäjb, baseedzani rexpejn Israel guesnäjäreni chutis gunaa. ¹⁵ Sigajcza nadxaag lojtu gaii bejn ni riu rediidx ni rusule' reni laa nicolaítas. ¹⁶ Colgusiechxgaa lajztu, te di jialgacä lojtu te gucuanääreni spaad ni yu' ro'ä. ¹⁷ Nani rrlajz cuadiajg diidx, sucuadiajgni diidx ni rnii Sprit Dxaan xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sudedäza lojni te guibáz ni najc nol, lojni caj te lajni ni nacoob, nani rutru racbeedi, xtebtis nani xca'ni."

Rediidx nani rniini lo rexpejn guidoo ni yu' Tiatira

¹⁸ Dxejcti najni löä:

—Bacuaa rediidxre lo xangl Dios xten guidoo ni yu' Tiatira: "Xi'n Dios nani rbebajl balojni, ni rdimbicha' ni'ni si'c bronz, ni'c rnii rediidxre lojtu: ¹⁹ Ananá xtzuuntu, sanälajztu sa'tu, nanä xho rililajztu xtidxä, xho racnäjtü resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu. ²⁰ Niluxh yu' xhicient rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profe't, gunaa ni rnii xtidx Dios, rusgueetisni bejn. Luxh xcäl'ruseedni cagugueeni rexpenä nani ahuililajz xtidxä, te naj rujnreni cosguijdx, si'c yälresnäjä ni di gac chäälni, rajwzarenä nani gurej lo dxan xten rebanäjb. ²¹ Aguläzä xchej te gusiech-lajzni, gusaanni gunni dojl, luxh naaddini gusiech-lajzni xcuent redzunguijdx ni rujnni. ²² Luxh palga laani dini gusaan gunni redzuun nani rujnni, narä siguixäni, gudedä te yälracxhuro. Luxh sutedä trabajwduxh guiraa renani bennäjni dzunguijdx palga direni gusiech-lajzreni, palga direni guchaa xmoodreni. ²³ Sugutxhiä, sunitlöä rexi'n gunaaga, te si'c gacbee guiraa rebejn ni yu' nejn reguidoo narä nacä ni rula'tz rexhigab ni yu' xcäriejnreni, näjza yälrililajz ni yu' nejn lastooreni. Te gacbeezarenä narä

sunidxä lo tejgatu ni riäjł xca'tu xcuent redzuun ni rujntu. ²⁴ Dxejc loj guiraa reni yu' lo guedx Tiatira, la'tu ni di guirinajł xnezyuj Jezabel, la'tu ni di gumbec nani rniireni najc recosduhx xten beıdxab, xhetru rniädi lojtu, dirunä gutalä xtzuuntu. ²⁵ Colyapdzu'tz rextidxä nani arajptu dxejli ni guibisacä lojtu. ²⁶ Nani gun gaan lo dojl, näjza nani cagusoob xtidxä dxe lultli, lojni sudedä yälrnibee te guinibeeni renacion. ²⁷ Si'cni baniidx Xtadä yälrnibee loä, sudedä yälrnibee lojni, te guinibeeni guiraa reben guedxliuj, gunnäjni yälguxhtis lojreni te barguui si'c rujn ni runchee guesbajł, rlia'ni guiraa regues nani xhet sajcdi. ²⁸ Sunidxäza bale' xhaguibaa ni rii rsildoo (ni säloj guibanäjnu Dios). ²⁹ Nani rıajz cuadiajg sucuadiajgni diidx ni rnii Sprit Dxan xten Dios loj reguidoo.”

3

Rediidx nani rniini lo rexpejł guidoo ni yu' Sardis

¹ Dxejcti najni loä:

—Bacuaa rediidxre lo xangl Dios xten guidoo ni yu' Sardis: “Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rnii rebejł nabajłtu, niluxh narä nanä ascanu agujttu, dirutu gun xtzunä. ² Colguibajł, colgula'tzru nani rapsijctu xcuent rextidxä nani ameer nitloj neł lastootu. Narä ruhuiä ditu niunsa'c dzuun xtenä nez loj Dios. ³ Colgusnaj lajztu rediidx ni basule'reni lojtu, nani abacua-diajgtu, colgusoob rediidxga, colgusiech lajztu. Palga ditu guibajł, palga ditu guchaa xmoodtu, sidzunä nez lojtu si'c te gubaan, nicla gaantu cor guidzunä lojtu. ⁴ Niluxh yu' gaiisi bejł lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa'csi laareni säbyäjłreni. ⁵ Nani gun gaan lo dojl, ni'c sajc gacwni ladnol, luxh dizana guche'nä lajni loj xlibr

cadro caj laj renani sibaj_nnäj Dios par tejpas. Sicäpäza nez loj Xtadä näjza nez loj guiraa rexquixhajgni, bejn_ga najc rexpenä. ⁶ Nani rlajz cuadiajg diidx, sucuadiajgni diidx ni rnii Sprit Dxiän xten Dios loj reguidoo.”

Rediidx nani rniini lo rexpejn guidoo ni yu' Filadelfia

⁷ Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäi toDavid (ni säloj guiragajc yäl_rnibee), nani che ruxhalni, rut rusäuudi, nani che rusäuuni, rut ruxhaldi, laani rniini diidxre lojtu: ⁸ Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yäl_rnibee lojtu te gusule'tu xtidxä, rutliidi sajc gusäuu ro'tu. Mase guxii nadip-nadaantu, atu canii xtidxä, ditu cuatzlajz xtidxä. ⁹ Suhuiitu xho gunä rebejn ni yu' lo guidobäz xten ben_dxab. Rniisireni najcreni xpejn Israel, luxh direni gac; rusgueerene bejn. Narä sunäpac jädzuxhijbreni nez lojtu, sunäza gacbeepacreni sanälazduxhä la'tu. ¹⁰ Sa'csi basoobtu xtidxä ni gunibeä sutijptu, na'c jieedtu, ni'cni narä sacnäázatu che guidzuj_n dxej tedtu trabajw. Luxh orga ameer guidzuj_n lo guideb guedxliuj, luxh sidejd guiraa rebe_n guedxliuj trabajw, te guibee rebe_nsa'c lo rebe_n guedxliuj. ¹¹ Narä di gaclaa jäälä; gopdzu'tz ni rajptu, te rut gudzucajdi ni gunidxä xca'tu. ¹² Nani gun gaan lo dojl, narä gunäni si'c te pilajr ne_n xquidoo Xtioozä, nalajznu, sajcnite bejn nani gac guinibee cadro yu' Dios. Sibaj_nni ro'c par tejpas, diruni guirii ro'c. Lojni gucuaä laj Dios näjza laj guejdx xten Dios ni najc Jerusaléncoob, nani guirii xhaguibaa cadro yu' Dios; lojni sucuaäza laä ni najcza nacoob sa'csi najcni xpenä. ¹³ Nani rlajz cuadiajg diidx, sucuadiajgni ni rnii Sprit Dxiän xten Dios loj reguidoo.”

Rediidx nani rniini lo rexpejn guidoo ni yu' Laodicea

¹⁴Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testiigw ni rniliipac, ni di cuääz guiniini didxliiga, nani guläxtiej guedxliujre näj guiralii ni benchee Dios, laani rniini scree: ¹⁵Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläii guntu tejni o steeni! ¹⁶Ni'cni, sa'csi najctu si'c nistiib, ditu gac si'c nisnajl, niclaza gactu si'c nislaa, sibäro'ä la'tu. ¹⁷Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu beñ gubijn, te beñ probduxhlu, di lojlu jien, luxh suga'lu xhabäälü nez lo Dios. ¹⁸Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladmol gacwlu, te di guitujyлу suulu xhabäälü; gusiiza unguent loä te chää balojlu, te jien lojlu. ¹⁹Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblajz; colgusiejch lajztu. ²⁰Colhuii, ana suga'ä roxlä' lastootu, cagusezä, cabedxa'ä. Palga yu' chu tejtü ni jiejn diajgni xse'ä, guxhalni xpuert lastooni, siu'ä lastooni, te gacnäáni, te guibaṅsa'czani nez loä. ²¹Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtadä cadre rniibeeni xhaguibaa. ²²Nani rlanj cuadiajg diidx, sucuadi-ajgni diidx ni rni Sprit Dxan xten Dios loj reguidoo.”

4

Calä'preni xpala'n Dios xhaguibaa

¹Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejcru gunii xse' nani biejn diagä ganiddoo, nani riejn si'c xse' te trompet, najni loä:

—Huä'p, gudaa ree, te guluiä lojlu recos ni churu gac che luux gac recosre.

² Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilro cadre rbej nani rnibee xhaguibaa, luxh ro'c sobga' nani rnibeeni. ³ Nani sobga' lo yagxhilga, rienni si'c te guisa'c ni rbebalsejs, si'c reguisa'c ni laa jaspe, näj cornalina. Guideb gabi yagxhil cadre rnibeeni dejd te xquitgubijdx ni rbebalsejs si'c guisa'c ni laa esmeralda. ⁴ Guideb gabi cadre rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc tejgareni. ⁵ Nez lo yagxhilro cadre rnibeeni rii reyälrdinya' näjza guzii. Nez loj cadre rnibeeni cayalguij gajdz bajl ni najc gajdz Sprit Dxaan xten Dios. ⁶ Nez loj cadre rnibeeni yu' astoocanu te nisdoo ni rien si'c te guihuanro, rdimbichasejsni.

Galäii yagxhilroga näjza guideb gabini suga' tajp man, guideb nez lojreni näjza nez dejtreni yu' balojni. ⁷ Manganidga najc si'c te lion; man ni rojpga najc si'c te gonbäz; man ni riojnga rujn lojni si'c rujn loj te niguii; man ni rdajpga najcni si'c te bisiro cagutajp xhaguibaa. ⁸ Niluxh guidap remanga tejgareni yu' xho'p xhigareni, guideb gabireni, näj nez nenreni liguidxa balojreni, niluxh direni gusilajz, dxej-yääl caniireni:

Dxaan, dxaan, dxaan najc Dad Dios ni rajp yälrnibeduxh, nani yu' galooli, nani yu' naj, nani churu jiaäd.

⁹ Guidap remanga rliä'preni xpala'n Dios, rusuxhijbreni rajnrenini, rdeedzareni xquixtios loj nani rnibee par tejpas. ¹⁰ Dxejc guigalbitap rebengool, suzuxhijbzareni loj nani rbej lo yagxhilro, te ganreni nani nabajn par tejpas. Sucuaareni xcoronreni nez loj xyagxhilroni, siniireni lojni, säjpreni:

¹¹ Dad Dios baxhuaannu, Guejbpac̄lu riäj̄l xca' guiraa rebala'n, guiraa reyälruzuxhijb, guiraa reyälrnibee, sa'csi Guejblu guläxtiej guira'ti nani yu' naj, yu'reni sa'csi rlanj Guejblu chureni, ni'cni benchee Guejblu guiraareni.

5

Te guijt̄z nāj te ni najc Xiil xten Dios

¹ Dxejcru narä Juan bahuiä lo nani sobga' lo yagxhilroga. Naani ladbee ca'ni te libr, najcni si'c te bilu guijt̄z. Caj diidx nez lojni caj diidx nez dejt̄zni, nadxe'ni, caj gajdz sei lojni. ² Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäj̄l guxhal guijt̄zre? ¿Chuni'c riäj̄l gutiäjs reseire?

³ Niluxh nicla tej bejn̄ di nidxäj̄l ni riäj̄l gutiäjs reseiiga te guxhalni guijt̄zga; nicla xhaguibaa, nicla lo guedxliujre, nicla xhajiät nez nen̄ guedxliuj. Niclaza nidxäj̄l chu niajc nuhuiu lo guijt̄zga. ⁴ Narä ronduxhä sa'csi nicla tej rut riäj̄l di gutiäjs reseiiga, niclaza ni riäj̄l goļ guijt̄zga, niclaza ni riäj̄l fiitis lo guijt̄zga. ⁵ Dxejcti gunii te bengool loä, najni:

—Na'cru goonlu. Bahuii gan, niguii ni rniireni Lion̄, xagdoo toJudá, xagdoo toDavid, abejnni gaan lo yälgujt̄ ni'c naj riäj̄l guxhalni guijt̄zga, gutiäjszani guigajdz reseiiga.

⁶ Dxejc bahuiä nez cadro suga' yagxhilroga nāj guidap remanga, nāj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni nājza gajdz balojni, ni najc gajdz Sprit xten Dios nani ruxhalni guiraa nez lo guedxliuj. ⁷ Laani gubigni, cua'ni guijt̄zga, guläänini naa ladbee xten nani sobga' lo yagxhilroga canibee. ⁸ Che cua'ni

guijtzga, guidap remanga näjza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zareni taz oor guidxa te ni najc si'c yaal. Yaalga najc guiraa reyälrbeydx, yälrniab xten rexpejn Dios. ⁹ Cayolzareni te dicoob ni najc scree:

Guejblu sacduxh,
riäjlpac xca' Guejblu guijtzga,
gutiäjs Guejblu reseiiga, sa'csi bagu't rebejnlu,
näjza xtiejnlu gudijx xcuent bejn lo Dios.
Gudijxlu xcuent bejn ni najc garen-garen raz,
ni rnii garen-garen didxsaj,
ni siääd garen-garen guejdx lo garen-garen ladxbejn.

¹⁰ Badeedlu gacreni reii näjza bixhojz lo Dios.

Laareni sinibeereni reben guedxliuj.

¹¹ Che bahuiä, biejn diagä xse' xhidalduxh xangl Dios ni suga' guideb gabi yagxhilro cadre rbej nani rnibee, näjza xse' guidap reman, näjza xse' guiraa rebengool. Luxh di gacdi guigab xangl Dios ni tre' ro'c sa'csi xhidalduxhtej najcreni, xhidalduxh miyon najcreni. ¹² Dipduxh najc xse'reni, caniireni scree:

Sacduxh Xiil nani bagu'treni,
ni'c riäjlpac xca'ni yälrnibeduxh, yälrapduxh, yälñanduxh,
yälmilagwr.

Riäjlpac guiliä'pnu xpala'nni, guzuxhijbnu lojni ganñuni,
guedeenu xquixtios lojni.

¹³ Dxejcti biejn diagä xse' guiragajcreni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xhajiät nez nen guedxliuj näj lo nisdoo, biejn diagä caniireni scree:

Loj nani sobga' lo yagxhilro cadre rnibeeni,
näjza loj ni najc Xiil xten Dios, laatisni sacduxhni,
guiliä'pnu xpala'nni, guzuxhijbnu nez lojni ganñuni,
gäbzanu rinibeeni par tejpas.

¹⁴ Dxejcti guidap remanga rnigajcreni scree:

—Sugacni si'c.

Dxejcti guigalbitap rebengool bazuxhijbreni nez loj nani nabajñ par tejpas, gojñrenini.

6

Guigajdz reseii

¹ Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te fiilu.

² Dxejc bahuiä lo te cabai nol. Nani bijb dejtzni ca' te arcw nani rucuaa fle'ch. Badeedreni te coron lojni. Biriini cayujñni gaan te chanuutis gunni gaan.

³ Che batiäjsni ni rojp seiiga, biejn diagä gunii ni rojp manga, najni loä:

—Gudaa te fiilu.

⁴ Dxejc bahuiä lo te cabai xniaa. Loj nani bijb cabai xniaaga badeedreni yälrnibee gudzucajni yälñadoo, yälrbedxilajz, lo guedxliujre, te ju't sa' rebejñ. Badeedreni te spadro cua'ni.

⁵ Dxejcti che batiäjsni ni riojñ seiiga, biejn diagä gunii ni riojñ manga, najni loä:

—Gudaa te fiilu.

Dxejc bahuiä lo te cabai yas. Nani bijbni naazni te balans. ⁶ Biejn diagä astoo galäii guidap remanga, birii xse' te ni canii scree:

—Tej kil xob xca'lu gunlu dzuun tebdxej; chon kil salbaad xca'lu gunlu dzuun tebdxej. Niluxh na'c guhuallu bin niclaza se't.

⁷ Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te fiilu.

⁸ Dxejc bahuiä lo te cabai gojtz. Nani bijbni laa yälgujt, luxh dejtzni siädnalgajc ni rnibee gabijl. Gula'ni rebejn ni re' lo guedxliujre gujcreni tajp gala', dxejc loj redee badeedreni guinibeereni lo te cuaa rebenguedxliuj te ju'treni rebejnga con spaad, näj yälrliaan, näj yälracxhuu, näjza remanduxh ni yu' dajn.

⁹ Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. ¹⁰ Dipduxh caniiireni, canabreni lo Dios, räjpreni:

—Dad, ni najc Dxan, ni najc guliipac. ¿Gucli cuääz, gaclaa gun Guejblu yälguxhtis loj reni bagu't nuure lo guedxliuj te quiixreni ni bejnreni?

¹¹ Dxejcti cua'reni te ladnolbäj gojt tejpgareni. Dxejc räjpreni lojreni cuäzsijcreni, gusilajzreni, lal ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

¹² Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäii gujc guidebni si'c rejn. ¹³ Rebajl ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajgga. ¹⁴ Dxejcti gunitloj guibaa si'cni rnitloj te guijtz che re'ni, rajcni te bilu. Guiraa redajn näjza reyuj ni re' galäii lo nisdoo biniibreni, bidxaa xlajdreni. ¹⁵ Ni'cni guiraa rebenguedxliuj, rebejn nani rnibee, näjza rebenro, näjza recapitán, näjza reben rapduxh, näjza reben ni nadiplajzreni, näjza remos, näjza renani rut lojdi yu'reni, guiragajcreni baxunreni, huicuatzlojreni nen rebiliää nen redajn. ¹⁶ Dxejc räjpreni loj redajn, loj reguilaj:

—Colguitejb yejcnu, colgucua'tz nuure loj nani rbej lo yagxhilo xhaguibaa näjza loj yälguxhtis xten nani najc

Xiil xten Dios. ¹⁷ Sa'csi abidzujn dxero xten xcäl_guxhtisni, ¿chuni'c sajc suu nez lojni?

7

Tegayuu tiubitajp mi rexpejn Israel

¹ Dxejcti bahuiä lo tajp xangl Dios ni suga' loj guidajp laad guedxliuj. Caguscuaázreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyajg. ² Bahuiä lo stee xangl Dios, ni siääd nez cadre rliejn gubijdx, ca'ni seii xten Gueb Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, näjza lo nisdoo. ³ Räjzni lojreni:

—Guläzsijctero, la_l ni guicuaanu te seen lo cuaj reni najc xpejn Dios, te dxejcru sajc guntu daan lo yuj, näj loj nisdoo, näj loj reyajg.

⁴ Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp mi_l bejn ni bibe loj rexpejn Israel. ⁵ Loj rexpejn Judá bibe tzubitio'p mi_l; loj rexpejn Rubén bibe tzubitio'p mi_l; loj rexpejn Gad bibe tzubitio'p mi_l; ⁶ loj rexpejn Aser bibe tzubitio'p mi_l; loj rexpejn Neftalí bibe tzubitio'p mi_l; loj rexpejn Manasés bibe tzubitio'p mi_l; ⁷ loj rexpejn Simeón bibe tzubitio'p mi_l; loj rexpejn Leví bibe tzubitio'p mi_l; loj rexpejn Isacar bibe tzubitio'p mi_l; ⁸ loj rexpejn Zabulón bibe tzubitio'p mi_l; loj rexpejn José bibe tzubitio'p mi_l; loj rexpejn Benjamín bibe tzubitio'p mi_l.

Benguixhuj ni najcw ladnolbäj

⁹ Dxejcti bahuiä lo xhidalduxh bejn, benguixhuj, nicla tej bejn digacdi gulabreni. Garen-garen ladx-bejn siäädreni, garen-garen najc lajdxreni, näj raz xtenreni, näj xtiidxreni. Suga'reni nez loj yagxhilo xten ni rnibee,

näjza nez lojni ni najc Xiil xten Dios. Najcwreni ladnolbäj, ca'zareni zijñ. ¹⁰ Dipduxh rniireni, räjpreni:

Dios ni rnibee lo yagxhilro, näjza nani najc Xiilre, baslaareni nuure lo xtojlnu.

¹¹ Suga'za guiraa rexangl Dios guideb gabi yagxhilro cadre rnibeeni, näjza guideb gabi rebengool näjza guidap remanga, dxejcti bazuxhijbreni, basajbreni lojreni nez lo Dios, ¹² räjpreni:

Sugacni si'c. Loj Xtiostisnu colye'tz sacduxhni;

colguiliä'p xpala'nni;

laatisni rajpni yälñajñ;

lojtisni colgudeed xquixhtios, laatisni colgan,

colsuxhijb lojni; laatisni rajpni yälrnibee näjza yälmi-lagwr.

Sugacni si'c par tejpas.

¹³ Dxejc gunii te bengool loä, najni:

—Renani najcw reladnolbäjre, ¿chu najcreni? ¿Casiää-dreni?

¹⁴ Dxejcti räpä lojni:

—Dad, anajn Guejblu.

Dxejc najni loä:

—Redee najc renani agudejd yältrabajwduxh, renani abia rextojlni sa'csi xtiejn Xiil xten Dios agudijx xtojlni. ¹⁵ Ni'cni suga'reni nez loj yagxhilro xten Dios dxejyäl cayujnreni xtzuunni neñ xquidooni. Ni'cni sacnä j nani sobga' lo yagxhilroga guiraa renani suga' nez lojni, sunäjtisni laareni. ¹⁶ Dirureni guiliaan, niclaza jiojlni, diza gubijdx guze'c lojreni, dizareni gacnanlaa. ¹⁷ Sa'csi nani najc Xiil xten Dios ni sobga' galäii loj yagxhilro xten Dios, laani cayajpnireni si'c xilbäz, sinänireni cadre yu' nisya ni rudeed yälñabajñ par tejpas. Suspijdz Dios nisbee balojreni, dirureni goon par tejpas.

8

Ni rajc gajdz seiiga

¹ Che batiäjsni ni rajc gajdz seiiga, gucdxi xhaguibaa si'cti med or. ² Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't. ³ Dxejctiru biääd stee angl, ca'ni te bacue ni najc ganax oor, bazujnini nez loj piändxan. Badeedreni lojni naclejn yaal te cachaagnini loj guiraa rextidx xpejn Dios ni rni-ireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhilroga. ⁴ Dxejcti gujxhga nägajc rextidx rexpejn Dios, birii ladsnaa xangl Dios ni ca' bacue, huä'preni nez loj Dios. ⁵ Dxejcti lagajc anglga cua'ni guiboo ni dzuub lo piändxanga, bachajni bacue, dxejcti baslojnini lo guedxliuj. Dxejc guyu' te guziduxh, bidinyaduxh, gujczä te xuduxh.

Retrompe't

⁶ Dxejcti guigajdz rexangl Dios ni ca' guigajdz retrompe't, guzusinreni te guisloj gołreni retrompe'tga.

⁷ Che bil trompetganid, guixob näj guiboo nu'chreni rejn gusloj cayajbreni loj guedxliuj. Dxejcti huejc ni riojn la' guedxliuj, huejcza ni riojn la' reyajg näjza guiralii recuaan.

⁸ Che bil ni rojp xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujc ni riojn la' nisdoo si'c rejn. ⁹ Dxejcti gujt ni riojn la' rebäjil näj guiraa reman ni yu' loj nisdoo. Gunitlojza ni riojn la' rebarcw ni sazaj lo nisdoo.

¹⁰ Che bil ni riojn xangl Dios trompe't ni ca'ni, biajb te balro xhaguibaa, cayejcni si'c te balguejd. Bitejbni loj ni riojn la' regueuu, näjza cadro rliejn nis. ¹¹ Laj bajlga najc Ajenjo, ni säloj te cos ni nanladuxh. Ni riojn la' nis

gujc nis nanladuxh. Dxejcti gujt xhidalduxh bejn xcuent nisnanlaaga.

¹² Che bil ni rdajp xangl Dios trompe't ni ca'ni, guxhijn ni riojn la' gubijdx, najza ni riojn la' bäii, najza ni riojn la' rebal xhaguibaa, bicäjyreni. Dxejcti dirureni guzanij ni riojn la' dxej, naj ni riojn la' yääl.

¹³ Dxejcti bahuiä xhaguibaa, biejn diagä si'c te bisij cagutajt nez galäii xhaguibaa. Biejn diagä cabedxa'ni, caniini rediidxre:

—¡Aii! ¡Aii! ¡Aii! Riaduxhä reben guedxliuj che guisloj gol schon rexangl Dios retrompe't ni ca'reni. Sidejd reben guedxliuj trabajwduxhru.

9

¹ Che bil ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni läii ni ruxhal ro' gabijl. ² Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. ³ Dxejcti lo gujxhga birii betzsu gusujreni guideb lo guedxliuj. Cua'reni yälrnibee gacreni nialajz si'c nialajz renaxejb. ⁴ Cua' remanga yälrnibee na'c gunreni daan loj reguixa', loj recuaan, loj reyagbajn; rebejntis nani xhet beedi xten Dios caj lo cuajreni, reni'c gusacsíreni. ⁵ Cua'reni yälrnibee na'c ju'tni bejn, gaii bäii gusacsíreni xcälñayanreni bejn. Luxh xcälñayanreni najc si'c yälñayan cadro rauya' te naxejb te bejn. ⁶ Nen redxejga, siguiil rebejn yälgujt, luxh direni guidxälni. Luxh mase rlazjreni guetreni, sibicaj yälgujt lojreni.

⁷ Rebetsure najc si'c recabaii ni suchee te chääreni lo guer. Yejceni yu' te ni najc si'c te coron oor; luxh lojreni rujn si'c loj rebejn. ⁸ Xquichejcreni si'c najc xquichejc gunaa; reläjyreni najc si'c läjy lion. ⁹ Luxh guideb

tiejxhreni caj si'c guiib ni rusäudzu'tzreni. Rubeduxh rexhigaareni, si'c rubej che ruxuñ xhidalduxh cabaii näj xcarreni che agojl chääreni guer. ¹⁰ Xhibaanreni najc si'c xhibaan naxejb, xcuchreni yu' yälñayan te gusacsíreni reben̄ guedxliuj gaii bäii. ¹¹ Yu'za ni rnibee lojreni, xangl ben̄dxab ni birii gabijl. Xtidx hebreo laani Abadón, xtidx griegw, laani Apolión.

¹² Naj agudejd tej casionroga, naj cayäädx stio'pni.

¹³ Che biñ ni rxho'p xangl Dios trompe't, biejn diagä te xse' bejn̄ ni lascanu siäädni galäii guidajp reca'ch ni caj loj xpiändxan ni nac-chee ganax oor, ni yu' nez loj Dios. ¹⁴ Luxh xse' bejn̄ga canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogueuu ni laa Eufrates.

¹⁵ Dxejcti baslaani guidap reanglga te ju'treni ni riojn̄ la' ben̄ guedxliuj. Luxh gule Dios reanglga parpac dxejga, bäiiga, ijzga. ¹⁶ Biejn̄ diagä bal najc guiraa resoldaad ni rbijb cabaii: najcreni tio'p gayuu miyon̄.

¹⁷ Scree bahuiä lo bacañ recabaiiga näjza renani bijb recabaiiga. Lastoo reni bijb recabaii caj te guiib, najcni xniaa näj zul näj gojtz. Dxejcru yejc recabaiiga najc si'c yejc te beedz. Ro'reni carii bajl näj gujxh, näj sufr. ¹⁸ Ni riojn̄ cuaa bejn̄ gujt xcuent guichoñ replaag nani carii ro' recabaii, xcuent bajl näj gujxh, näjza sufr. ¹⁹ Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

²⁰ Luxh guiraa rebejn̄ nani di replaagre nugu't, direni nusiejch lajzreni xcuent ni cayujñ ñaareni, te rajñreni reben̄dxab, näjza rebanäjb ni nac-chee oor, näjza pla't, näjza latón, näjza guij, näjza yajg. Luxh rebanäjbga di gacdi fiireni, di diajgreni jiejn, di gacdi sareni. ²¹ Diza

rebejn_{ga} nusiejch lajzreni xcuent xcäl_rugut_treni, xcäl_ru-
jnreni yäl_bidxaa, xcäl_resnäjreni bejn_u ni di gac chäälni,
niclaza xcäl_gubaanreni.

10

Te angl ni ca' te guijt_z

¹ Bahuiä stee xangl Dios ni rajp yäl_rnibeduxh, siäd-
jiäjtni xhaguibaa, li yu'ni nen_u bāj, yej_cni dejd xquitgu-
bijdx, luxh lojni najc si'c gubijdx. Reni'ni najc si'c tio'p
pilajr bajl. ² Ca'ni te librbäze', naxhal libre'ga. Bazujni
ni'ni ladbee loj nisdoo, bazujni ni'ni ladbājgw lo yuj,
³ dxej_c guredxaduxh anglga si'c rbedxa' beedz. Dxej_cru
gunii guigajdz guzii sigajcsa. ⁴ Che gulujx gunii guziiga,
narä rlazä nucuaä lo guijt_z nani guniireni, per biejn diagä
xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gu-
cuaaluni.

⁵ Angl nani suj ni'ni loj nisdoo nājza loj yuj, guläs n_aani
ladbee nez xhaguibaa. ⁶ Guniliini diidx con laj GuebDios ni
nabajn_u par tejpas, ni guläxtiej xhaguibaa nājza guiraa ni
tre' xhaguibaa; ni guläxtiej guedxliujre nājza guiraa ni tre'
lojni; ni guläxtiej nisdoo nājza guiraa ni tre' nen_u nisdoo.
Rāj_pni:

—Diru redxejre gaclaa. ⁷ Che guidzujntis dxej ni agojl
goļ ni najc rgajdz xangl Dios ni ca' trompe't, dxej_c abaza'
rextidxxhiga'tz Dios, si'c ni basule' redade' ni gunii xtidx
Dios agujc xchero.

⁸ Dxej_c gunisac xse' nani gunii xhaguibaali, stehuält
biejn diagä caniini loä, najni:

—Huij, te xca'lu libre' ni naxhal ni yu' ladz_naa angl ni
suj te laad ni'ni loj nisdoo, stelaad ni'ni lo guedxliuj.

⁹ Dxej_cti hua'ä lo anglga, rāpā lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajcni nejxh si'c dzujn.

¹⁰ Dxejcti cua'ä libre'ga lo naa anglga, dxejc gudauäni. Ro'ä guyu'ni nejxh si'c dzujn, luxh che gudämäni, lacti guc nanlaani xque'ä. ¹¹ Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rnii garen-garen xtiidxreni, näjza loj rerei.

11

Tio'p niguii ni rusule' xtidx Dios

¹ Dxejcti baniidxni loä si'c te biquii nani rurejxh. Dxejc guyu' chu naj loä:

—Huisu te charejxhlu xquidoo Dios, näjza piändxan, balabza balti bejn rusuxhijb nenga. ² Na'c gutiexhlu gabi lole' guidooga, sa'csi ni'c acua' rebenzijtni te tiubutio'p bäii chaläjsreni guedxdxan si'ctis ni rlajzreni. ³ Narä sudedä yälrnibee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mił tio'pgayuu gayojn dxej.

⁴ Guiro'preni najc si'c tio'p yag oliib, si'c tio'p gandilieer ni suga' nez lo Dios. ⁵ Palga yu' chu bejn rlajz gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjł guet chutis ni rlajz gun latsiajreni. ⁶ Guiro'p redade'ga rajp yälrnibee te gusaüreni xhaguibaa te na'c jiajb nisguij guideb nen redxej nani cagusule'reni xtidx Dios, rajpzareni yälrnibee te guchaareni nis te gacni rejn, rajpzareni yälrnibee te jädgusacsí xhitis plaag lo guedxliuj, si'ctis huält ni rlajzreni. ⁷ Che luux gusule'reni xtidx Dios, dxejcti ni najc si'c te man nialajz sirii gabijł te jädchagdijłni guiro'preni. Sujnni gaanreni, sugu'tniren.

⁸ Dxejcti jia'n guiro'p rebengutga lad caii xten guejdx

cadro bacuaareni Dad Jesucrist lo cruzj. Guejdxroga rbälajzareni Sodoma näjza Egipto. ⁹ Choñ dxej garol guiraa rebejn ni siääd guedxbáz, ni siääd guedxro, ni najc garen-garen raz, ni rnii garen-garen xtidx guiraa rebejn guedxliuj, suhiii loj guiro'p rebengutga, direni gusaan guiga'tzreni nen baa. ¹⁰ Guiraa renani nabajn lo guedxliujre sibalazduxhrene sa'csi gujtreni. Luxh sa'csi rbalajzduxhrene, suxhalzareni xhi xca' sa'reni; sa'csi guiro'p redade' ni basule' xtidx Dios baxhal trabajwduxh lojreni. ¹¹ Che gudejd choñ dxej garolga, baspañsac Diosreni, dxejcti huitiesacreni. Guiraa reni bahuii lojreni, bidxebduxhrene. ¹² Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Colchá'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa. ¹³ Lagajc orga gujc te xuduxh, gurebä'n tej lo tzuu la' guejdxga, gujt gajdz mil bejn lo xu ni gujc ro'c. Rebejn ni bia'n ro'c bidxebduxhrene, guslojreni calä'preni xpala'n Dios ni yu' xhaguibaa.

¹⁴ Si'cti gulujx ni rojp casioon, luxh agojl guidzujñ ni riojnga.

Ni rajc gajdz xangl Dios goł trompe't

¹⁵ Che bil ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni: Xcälrnibee guedxliuj agudejd ladzñaa Dad Dios näjza Jesucrist;

luxh laani sinibeeni par tejpas.

¹⁶ Galbitajp rebengool nani sobga' lo tron xtenrene cadro rnibee Dios, biabrlojreni nez loj Dios te calä'preni xpala'n Dios. ¹⁷ Räjpreni:

Xquixtioste Guejblu Dios, nani rajp yälrnibeduxh, nani najclu, nani gujclu, nani churu gac,

sa'csi acua'lu xcäl_rnibeduxhlu te agusloj canibeelu.

¹⁸ Bidxe'ch reben_ guedxliuj lojlu,
luxh abidzuj_n dxej guidxe'chlu lojreni,
gunlu yälguxhtis rebengut, te gudeedlu cossa'c loj rexpe-
j_nlu,
lo renani gunii xtidx Dios, lo renani huililajz xtiidxlu, lo
renani rusuxhijbni nez lojlu;
rebenproob sigajc rebenro.
Abidzuj_nza dxej che cuäcajlu renani bejn daan guedxliu-
j_re,
te nitlojreni par tejpas.

¹⁹ Dxejc bixal xquidoo Dios ni yu' xhaguibaa, nen_
guidooga bien_ te gui_jn cadro yu' gui_jn cadro caj rediidx ni
bia'n Dios loj rexpej_n Israel. Dxejcti lacti bidinya', lacti
guiniiza reguziro, gujc te xu, dxejc bja_jb te guixobroduxh.

12

Te gunaa nä_j te ni najc si'c te gutiatzro

¹ Dxejcti guyu' te senro xhaguibaa: te gunaa ni najcw
si'c gubijdx, ni'ni sojb bäii, yej_cni yu' te coron_ ni nac-chee
tzubitio'p balxhaguibaa. ² Gunaare nuxi'nni. Rbedxa'ni
sa'csi agusloj cayu' yoob xque'ni te gaal xi'nni, cadejdni
trabajwduxh. ³ Dxejcti bahuiä stee seen xhaguibaa: te
manxniaa ni rujn lojni si'c loj te gutiatzro, manduxhni.
Yu' gajdz bitiu_yej_cni, sojb tzuu xca'chni. Tejga yej_cni yu'
te coron_, najcreni gajdz coron_. ⁴ Dxejcti xhibaanni cagob-
xajxhni ni rioj_n la' rebalxhaguibaa, dxejcti bacuaanireni
lo guedxliuj. Dxejcti biädsu manroga nez loj gunaaga ni
ameer gaal xi'nni, te gauni xi'nni che gaalni. ⁵ Dxejcti gojl
xi'n gunaaga, naj_cni te niguii, luxh te bar guiib nungäj_l
guinibenäj_ni lo guiraa reben_ guedxliuj. Guläsgajcreni
bäzga te sanärenini xhaguibaa cadro rnibee Dios. ⁶ Dxejcti
baxu_n gunaaga, siini nez loj reyubijdz cadro yu' te lajt ni

basuchee Dios te cuääzni, te ro'c guyaannini te mił tio'p gayuu gayojñ dxej.

⁷ Dxejc guyu' guer xhaguibaa, xangl Dios nani laa Miguejl náj resa'ni bacuanäjreni gutiatzro. Gutiatzroga nájza rexanglñi gudilduxhreni, ⁸ niluxh direni niujñ gaan, luxh di niajcdiru nia'n manga nájza resa'ni xhaguibaa. ⁹ Dxejcti bacuaareni manroga nájza resa'ni lo guedxliujre. Laani najc ni gujc bäl galoroga, ni najc gueb Beñdxab, ni laaza Satanás, ni rusguee guideb guedxliujre.

¹⁰ Dxejcti biejn diagä xse' te ni canii dipduxh xhaguibaali, räjpni:

—Abidzujñ yälruslaa lo dojl, náj yälmilagwr, náj yälrnibero xten Dios, nájza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yääl. ¹¹ Laareni gujc bejnreni gaan loj beñdxabre, xcuent xtiejn ni najc Xiil xten Dios, nájza sa'csi huililazsa'creni xtidx Dios, dizareni nidxejb mase niejtzareni. ¹² Ni'cni, guiraa la'tu ni yu' xhaguibaa nájza gueb xhaguibaa, colquibalazduxh. Niluxh riaduxhnu renani rbäjz lo guedxliujre, nájza lo nisdoo, sa'csi abiäjt beñdxab lo guedxliuj, luxh cadxecheduxhni sa'csi anajñni guxii dxej rajpni.

¹³ Che guchee gutiatzroga abacuaarenini lo guedxliuj, birinajlñi gunaa nani guyu' xi'ngaanni te gusacsínini. ¹⁴ Dxejc badeed Dios lo gunaaga tio'p xhiga xten bisiro, te gac gutajtni nez lo reyubijdz cadre nac-chee cadre cuääzni. Chon ijz garol guyu'ni ro'c, nacuatzlojni lo bälga. ¹⁵ Dxejcti ro' gutiatzrore birii nis si'c te gueuu te nuslo'ni gunaaga. ¹⁶ Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga. ¹⁷ Dxejc bidxecheduxh gutiatzroga loj gunaaga, ni'c sääni te gucuanäjni sgaii rexi'n gunaaga, renani cagusoob diidx ni gunibee Dios, renani rililajzza xtidx Jesucrist.

13

Tio'p manduxh

¹ Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coron. Yu' gajdz bitiuvejcnı cadro caj diidx ni rniyaj Dios. ² Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmlaagwrni lojni, näjza tron cadro rbejni, näjza xcälrnıbeduxhni. ³ Dxejctı bahuiä te yejcni najc ascanu yu' chu batiuugni con madxed, ameer guetni, luxh biajc cadro gurujg yejcni. Ni'cni rdxeloduxh guiralii rebejnı guedxliuj, sanajlreni manduxhga. ⁴ Bazuxhıjbreni gojnıreni gutiatzroga sa'csi badeedni xcälrnıbeeni lo manduxhga, dxejctıru bazuxhıjbreni gojnızarenı manroga, räjprenı:

—¿Chu stee najc si'c manrore, ä? ¿Chu laa ni gac guichagdıjnı, gucuanäjnıni?

⁵ Yu' chu badeedza lo manroga diidx dxejctı gusloj canıni guiraloj didx-guyalajz, diidx ni rniyaj Dios. Yu'za chu badeed ga'pni yälrnıbee tiubıtıo'p bäıı, gunni si'ctıs ni rlajzıni. ⁶ Baxhalni ro'ni, gunıyaduxhni Dios, gunıyajni laj Dios, näjza xquıdoo Dios, nalajznu renanı yu' xh-aguıbaa. ⁷ Dxejctı yu' chu basaan bacuanäj manroga rexpeljı Dios. Bejn manroga gaan rexpeljı Dios, dxejctı gunıbee manroga guıraa reguedxbäz, näj guıraa rebejnı ni rnıı garen-garen xtııdxrenı, näjza guıraa reguedxroduxh. ⁸ Dxejctı guıraa rebejnı guedxliuj sazuxhıjbrenı, sagajırenı manroga, guıraa rebejnı nanı dı lajrenı nıcaj lo librı xten yälınabajı xten Xııl nanı gujt xcuentrenı, sa'csi galoolı guırıxtıej guedxliuj cuaj lo guıjtze laj guıraa ni gac xpejnı Dios.

⁹ Palga yu' chu rlajz cuadıajgnı, sugucadıagsa'cni.

¹⁰ Palga yu' chu nungäjı jıäuu nejnı latzguııb, sıäıupacni.

Chutis ni ju't te bejn con te madxed, con madxedza guetni. Ni'cni renani anumbee Dios, riäjĭ gunreni huant, chanuutis chalilazsa'creni xtidx Dios.

¹¹ Dxejcti bahuiä loj stee manro, cariini nenĭ yuj. Sojb tio'p xca'chni si'c xca'ch te xiil, rniini si'c rnii te gutiatz.

¹² Luxh rnibeezani si'cni rnibee manroga lagajc nez loj manroga, rujnzani rusuxhijb rebenĭ guedxliuj loj manrogalooga ni gurujc yejcnĭ, luxh biajc yejcnĭ. ¹³ Manroga ni birii nenĭ yuj rujnzani remilagwrro, rujnni rtejĭ balguiboo xhaguibaali, rtejbni lo guedxliuj nez loj rebejnĭ.

¹⁴ Rusgueeni rebejnĭ nani nabajnĭ lo guedxliuj xcuent remilagwrro nani rujnni nez loj manrogalooga. Guinibeeni gun rebenĭ guedxliuj te banäjb si'c najc manroga nani batiuug madxed yejcnĭ, luxh biajczā yejcnĭ. ¹⁵ Dxejcti man ni rojĭpĭgā baspajnĭ banäjbĭga te guinii banäjbĭga, dxejcti gunibeeni guet guiraa rebejnĭ nani di guzuxhijb lojni te ganrenini. ¹⁶ Gunibeezani chu bejnĭ te seen lo cuajni o ñaani ladbee, guiraa rebejnĭ ni xhet rajpdi, guiraa rebejnĭ ni rajp, guiraa reni najc mos, guiraa reni najc lam, guiraa reni najc benro, guiraa reni najcza benbäz. ¹⁷ Gunibeezani digacdi sii, digacdiza guto' bejnĭ palga xhet seendi caj ñaani o lo cuajni. Seenga najc laj manga o numbr xten laj manga. ¹⁸ Dee rquiin yälĭnajĭ. Renani rajp yälĭnajĭ sugulabreni xseen manga, numbrĭga najc si'c xnumbr bejnĭ; numbr xten manga najc xho'p gayuu gayonbixho'p.

14

Dij ni rolĭ te gayuu tiubitajp miĭ

¹ Che bahuiä stee, bahuiä suga' Xiil xten Dios yejc dajn ni laa Sión. Suganäjĭni te gayuu tiubitajp miĭ bejnĭ nani caj lo cuajreni laj Xiil näj laj Xtadni. ² Biejn diagä rubej xhaguibaali, rubeduxh, riejnni si'c rubej xhidajĭ gueuro, näj te guziro; riejnzani si'cni riejn che cayolĭ xhidajĭ bejnĭ

ni rol arp. ³ Cayolreni te dicoob nez loj tron cadro rbej nani rnibee, nájza nez loj guidap reni najc si'c man ni nabajnpac, nájza nez loj rebengool. Rutliidi gujc bisieeddi dijga, xtebtis tegayuu tiubitajp mił bejn nani gułaa lo reben guedxliuj. ⁴ Reniguiire najc renani gajd xhiñ con gunaa; nicla tejreni di niesnäj te gunaa, najcreni ben dxan. Laareni rinajlreni Xiil xten Dios cadrotis sääni. Redee gułaa lo reben guedxliuj si'c te gojn lo Dios nájza lo Xiil xten Dios. Gojnre najc si'c gonganid ni rudeed bejn xten te cose'ch. ⁵ Nicla tej didx-xhii di guirii ro'reni, sa'csi xhetliidi xtojreni, nayareni suga'reni nez loj tron cadro rnibee Dios.

Rediidx nani bazule' jion rexangl Dios

⁶ Dxejcti bahuiä loj stee xangl Dios, rutajtni nez galäii xhaguibaa, siädnäni diidx ni najc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbäz, loj reben ni najc garen-garen raz, nani rnii garen-garen xtiidreni. ⁷ Dipduxh guniini, räjpni:

—Colguidxejb Dios, colguiliä'p xpala'n Dios sa'csi abidzujñ or gunni yälguxhtis guiraa rebejn. Colguzuxhijb loj nani benchee xhaguibaa, nájza guedxliuj, nájza nisdoo, nájza cadro rliejn nis.

⁸ Dxejcti siädnajl stee angl nani canii:

—Abiajb, abiajb guejdxroga nani laa Babilonia, sa'csi baquiilni guzojz guiraa reguejdx xten guedxliuj xcuent xcäl-latsiajni, xcuent dojl ni bejnni guideb lagaa; najcni si'c reni rä' nejp.

⁹ Dxejc biädnajl ni riojn xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo naani, ¹⁰ sidxechduxh Dios lojni, di xcälguxhtisduxh Dios tedcaj lojni. Sidejdpacni trabajwduxh nen

balro näjza azufr nez loj rexangl Dios näjza nez loj Xiil xten Dios. ¹¹ Luxh gujxh xten reni cayejc sä'p nez lojreni guixe-guixee par tejpas. Digacdi gusilajzreni dxej-yääl, renani guzuxhijb, reni gojñ manroga näjza reni gojñ banäjb ni najc si'c manroga, chutisza ni rca' seen xten lajni. ¹² Ni'cni renani huililajz xtidx Dios, reni rusoobza xtidx Dios, ni rinuutis lo xnezyuj Jesucrist, nanab di guidxajgreni.

¹³ Biejn diagä xse' te ni caniini loä xhaguibaali:

—Scree bacuaa: “Chicbaa rebejn ni guet najli nani rililajz xtidx Jesucrist.” “Guliini”, naj Sprit Dxan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

Yäl_nasa'c ni rudeed guedxliujre

¹⁴ Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguui. Yu' te coronñ ganaxduj oor yejcnì, dxejcti ñaani ca'ni te guiboz ni caduxh ro'ni. ¹⁵ Dxejcti birii te xangl Dios loj xquidoo Dios, dipduxh caniini loj ni sobga' loj bäjga, räjpni:

—Basäl xquibozlu, batiuug, te batie' yäl_nasa'c, sa'csi agojl or guire' yäl_nasa'c, guideb guedxliuj aguyajlñi.

¹⁶ Dxejcti nani sobga' lo bäjga basniibni xquibozni, batiuugni yäl_nasa'c ni caj lo guedxliujre.

¹⁷ Dxejcti stee xangl Dios birii neñ guidoo ni yu' xhaguibaa, ca'zani te guiboz ni caduxh ro'ni. ¹⁸ Dxejcti birii stee xangl Dios nez loj piändxan xten Dios. Laani räjpni yäl_rnibee lo balro. Dipduxh guniini, räjpni loj ni ca' guiboz ni caduxh ro'ni, räjpni:

—Basäl xquibozlu nez ni' reyaguub, batiuug guiraa reresim uub ni yu' lo guedxliujre, sa'csi aguyajlreni.

¹⁹ Dxejcti batiuug anglga guiraa reresim uub ni yu' lo guedxliujre nalajznu rebenguijdx, basäl_nireni neñ tanc

cadro gulājreni yejcnī sa'csi rdxechduxh Dios lojreni.
²⁰Dxejcti balājreni yejc reuub nez orii te guejdx. Biriiduxh
 rejn yejcreni, gutiās rejnga, bidzujñ rejnga ro'li recabaii,
 gujcnī si'c che riu' nisro gueuu, biājtnī si'cti choñ gayuu
 mil metr guideb gabi cadro balājreni yejc reuub.

15

Guigajdz xangl Dios nāj lult xcālguxhtis Dios

¹Dxejcti bahuiā stee senro xhaguibaa, nani baschelo-
 duxh narā. Bahuiā loj gajdz xangl Dios, tejgareni ca' te
 plaag ni gusacsí reben̄ guedxliuj. Redeetis najc lult, sa'csi
 che ted redee ati agulujx yālr̄dx'e'ch xten Dios.

²Dxejcti bahuiā loj tej ni najc si'c te nisdoo ni najc
 si'c biidr nu'chni bajl. Dxejcti galāii nisdoooga suga'
 renani bejn gaan loj manroga nājza lo banāj̄b ni najc
 si'c manroga, ni bejnza gaan di nica'reni seen xten lajni.
 Ca'reni arp xten Dios. ³Cayol̄reni dij xten toMoisés ni gujc
 xpejñ Dios, cayol̄zareni dij xten Xiil xten Dios. Scree najc
 dijga:

Sacduxh, ruscheloj guiraa redzuun ni rujn Guejblu, Dad
 Dios, ni rajp guiraa yālr̄nibee.

Rujn Guejblu ganax dzunsa'c, rnii Guejblu ganax didxlii.
 Guejblu rnibee loj guiralii reguejdx ni yu' lo guedxliuj.

⁴Bahuii, Dad, ¿chu laa ni di guidx̄ejb Guejblu ni di guiliā'p
 xpala'n Guejblu?

Sa'csi Guejbtislu najc dxan, ni'cni guiraa reguejdx ni yu'
 guedxliuj siādzuxhijbreni,

siādgajñreni Guejblu,

sa'csi abaluiloj guiraa rextzunsa'cpac Guejblu.

⁵Dxejcti bahuiā xhaguibaa, bixal ro' yu' ni najc dxanro
 nen̄ guidoo, cadro yuchee guij cadro caj xleii toMoisés.

⁶Ro' yudxanroga birii gajdz xangl Dios ni ca' plaag te
 gusacsíreni reben̄ guedxliuj. Najcwreni te ladliñ ni najc

nolbäj, ni rdimbichaduxh. Dejd si'c te cinturon lastooreni ni najc ganaxduj oor. ⁷ Dxejcti yu' tajp reni najc si'c man nabajñ ni yu' nez loj Dios xhaguibaa. Tej reni badeed loj tejga reanglga te co'p ni najc ganaxduj oor. Guidxa tejga reXHijgga xcälguxhtisro Dios nani nabajñ par tejpas. ⁸ Gudxaj guidoo ni najc yudxanroruga gujxh ni siääd xcuent xcälmlaagwr, xcälrdimbichaduxh xten Dios. Rut gujcdi biu' neñ yudxanroruga che gulujxli guiraa replaag ni ca' guigajdz reanglga.

16

Rexhijg ni guidxa xcälguxhtis Dios

¹ Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Colchäj, colchasloj guigajdz reXHijgga lo guedxliuj, colca' reXHijg ni guidxa xcälguxhtis Dios.

² Anglgaloo ni huij, baslojni ni yu' neñ xhijg ni ca'ni lo guedxliuj. Dxejc loj guiraa rebejñ nani caj xseen manduxh, reni rusuxhijb, rajñreni banäjb ni najc si'c manroga, birii tiejxhni te guedxyanduxh ni najc si'c cancer.

³ Dxejc ni rojp anglga baslojni ni yu' neñ xhijg ni ca'ni loj nisdoo, te bejnii gubixhloj nisdoo ga gujcni si'c rejn xten te bengut. Dxejcti gujt guiralii reman ni yu' lo nisdoo.

⁴ Ni riojñ anglga baslojni ni yu' neñ xhijg ni ca'ni loj regueuu näjza cadro rliejn nis. Gubixhlojreni gujcreni rejn. ⁵ Dxejcti biejn diagä gunii angl ni rajp yälrnibee lo nis räjpni:

—Huenduxh najc Guejblu Dad ni najc naj sigajc gujc Guejblu galoo, dxanduxh najc Guejblu sa'csi cayujñ Guejblu yälguxhtis redzunguijdx. ⁶ Sa'csi laareni baxhe'reni rejn, bagu'treni rexpejñlu näjza renani gunii xtiidxlu,

luxh naj badeed Guejblu rejn cayä'reni. Si'cpac nungäjĵ gacreni.

⁷ Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yäl̄rnibee, xcäl̄guxhtis Guejblu najc laaca, si'c riäjĵ gacni.

⁸ Dxejcti ni rdajp anglga cua' xhijg ni ca'ni, baslojni ni yu' neñ xhijgga lo gubijdx, te badeedni lo gubijdx yäl̄rnibee guze'cnäjni rebejn̄ guiboo. ⁹ Guiraliireni gusloj cayejcreni, lacti nanladuxh, dxejc gusloj caniyajreni Dios ni rajp yäl̄rnibee loj recosga. Niluxh direni nusiechla-jzreni, niclaza niliä'preni xpala'n Dios.

¹⁰ Dxejcti ni rajc rgaii anglga cua' xhijg ni ca'ni baslojni ni yu' neñ xhijgga lo tron̄ cadre rnibee manroduxh. Bicäy guideb cadre rnibee manduxhga, luxh rebejn̄ rauya'tisreni lujdxreni sa'csi cayajcreni yäl̄nayanduxh.

¹¹ Guniyajreni Guejb Dios ni yu' xhaguibaa sa'csi rajcreni yäl̄nayanduxh, xcuentza rexquedxnayanreni. Luxh direni nusiechlajzreni xcuent xtojĵreni.

¹² Dxejcti ni rajc xho'p anglga cua'ni xhijgni, baslojni ni yu' neñ xhijgga loj gueuro ni laa Eufates. Gueuga gubidzlii nisni te guc-chee te nezyuj xten rereii ni jääd nez cadre rliejn̄ gubijdx.

¹³ Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii chon̄ spritguijdx ni najc si'c bedz, ¹⁴ sa'csi najcreni resprit xten beñdxab, rujnreni milagwr, senro. Rijreni loj guiraa rereii loj guedxliuj te gutie'reni guiraa bejn̄ loj guedxliuj te gac guerroduxh, te gucuanäjreni Gueb Dios ni rajp guiralii yäl̄rnibee che guidzujñni lo guedxliuj. ¹⁵ “Narä siädxhiga'tzä si'c riääd te gubaan. Chicbaaza renani cabäjz, cagutie'chreni bacal̄ lojni che guibi'ä si'c rujn nani najcw guiraa xhajn̄, te na'c guiga'ni xhabääl̄ni, jianxtujyni che guibi'ä.” ¹⁶ Dxejc

gutie'reni guiraa rebejnre te lajt ni laa lo didx hebre "Armagedón".

¹⁷ Dxejcti ni najc rgajdz anglga cua'ni xhijgni baslojni ni yu' nen xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

¹⁸ Dxejc guyuduxh yälrdinya' näj guziro. Gujczya te xuroduxh lo guedxliuj, te xu sa' ni gajdpac gac. ¹⁹ Che gujc xuroga, biräjs guedxroduxhga, gujcnj choñ la', dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yälguxhtis guedxga. ²⁰ Li gubicaj, gunitloj reyuj ni tre' lo nisdoo, gunitlojza redajn. ²¹ Xhaguibaali biajb te guixhobro yejc rebejn; tejsa guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcnj.

17

Gun Dios yälguxhtis te gunadxab

¹ Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijn nis. ² Guiraa rereii lo guedxliujre bennäjreni gunaaga dojl, sigajczya guiraa reben guedxliuj bennäjreni gunaaga dojl. Gusosnäjäreni gunaaga bejnreni si'ctis ni rlajzreni.

³ Dxejcti huiinäni narä si'c lo te bacal nez lo reyubijdz. Bahuiä loj te gunaa, bijbni dejtz te manro ni najc xnäa, luxh guidebni caj diidx ni rnijaj Dios. Gajdz najc bitiujejcnj, sojbza tzuu xca'chni. ⁴ Gunaaga najcw te lad moraad con xnäa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosgujdx, recosdxab ni bennäjni reben

guedxliuj. ⁵ Caj te diidx lo cuajni, luxh rut racbeedi xhi sälojni. Scree rnii diidxga: “Babilonro, xnan regunadxab, xnan recosdxab ni rajc lo guedxliuj.” ⁶ Bahuiä agusoꝝ gu-nadxabga. Agusosnäjni xtiejn rexpejn̄ Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä. ⁷ Dxejcti gunii anglga löä, najni:

—¿Xhicuent rdxelölu, ä? Narä siniä xhi säloj gu-nadxabga, näjza manroga ni sojb gajdz bitiuycjni näj tzuu xca'chni. ⁸ Manroga ni bahuiilu gubajñni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejn̄ ni nabajn̄ lo guedxliuj nani di lajreni nicaj lo guiꝝtz xten yäl̄nabajn̄ xten Dios, guiꝝtz ni guc-chee che birixtiejli guedxliuj, rebejn̄ga sidxeloduxhreni che fiireni loj manroga nani gubajn̄ galoo, ni gunitloj, niluxh naj agubansacni.

⁹ 'Ree nanab ga'pni yäl̄najn. Gajdz rebitiuycjni säloj gajdz dajn cadro sobga' gunaaga, ¹⁰ sälojzareni gajdz rei. Agujc gaii reiiga ni cayajb. Tej rereiiga canibee naj. Stee reiiga churu jääd. Luxh che jääd lult reiiga, guxii dxej guinibeeni. ¹¹ Manro ni gubajn̄ galoo, ni agunitloj naj, ni'c rac xhujñ rei, najczani tej loj guigajdz rerei, luxh sinitlojni, sejtni par tejpas.

¹² 'Guidzuu rexca'chni ni bahuiilu säloj tzuu rei. Gajdreni guisloj guinibee naj. Laareni näjza manroga xca'reni yäl̄rnibee teb or, nalajznu guxii dxej. ¹³ Tejtis xhigab gun rereiiga, gudeedreni xcäl̄nadipreni, xcäl̄rnibeereni lo manroga. ¹⁴ Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reii ni rnibee lo guiraa rerei. Luxh renani siädnajl̄ni najc reni agurejdxni, reni aguleni, sisiudzu'tznäjrenini.

¹⁵ Dxejcti najza anglga löä:

—Reni ni bahuiilu cadro sobga' gunadxabga säloj guiraa guejdx, guiraa beṅ guedxliuj, guiraa beṅ ni rni garen-garenca xtiidxreni, ni siäd garen-garen reguejdx. ¹⁶ Guitzuu reca'chga näjza manroga ni bahuiilu, sidxe'chreni loj gunadxabga, suro'nreni gunadxabga, susa'nreni gunadxabga xhabäälni, sawreni bältiejxhni, suze'creni gunadxabga lo guiboo. ¹⁷ Sa'csi abasniib Diosreni te gunreni tejsi xhigab, te gudeedreni xcälrnibeereni lo manroga che guidzujṅli dxej ni chale' guira'ti ni gunii Dios gac. ¹⁸ Gunadxabga ni bahuiilu säloj guedxro ni rnibee loj guiraa rereii loj guedxliuj.

18

Xho jiajb guedx Babilonia

¹ Dxejcti bahuiä loj stee xangl Dios ni siädäjt xhaguibaa. Siädnäni yälrnibeduxh, xcälrdimbicha'ni bazanij loj guedxliujre. ² Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, ṅaj najcni guejdx cadro rbäjz rebeṅdxab, ro'c ranzaj guiralii cuaa spritdxab, najczani xpitiäaz guiraa reman xhaguibaa ni najc mandxab, mandxuudx. ³ Sa'csi guiraa rebeṅ guedxliuj agusojzreni xcuent dojl ni bennäjreni gunadxabga, guiraa rereii loj guedxliuj bejn dojl guläsnäjreni gunadxabga, luxh guiraa rebeṅ guedxliuj ni ruto' abejreni ganduxh, agujcreni ri'cw xcuent recosdxab ni rujn gunabdxabga.

⁴ Dxejcti biejn diagä xse' stee nani canii xhaguibaa:

—Colguirii guejdxga rexpenä, te di näj la'tu gunnäjtu gunadxabga dojl, te di tedtu trabawduxh lo replaag xtenni. ⁵ Sa'csi yuduxh rextojṅni, abidzujṅreni xhaguibaali, luxh abanajza lajz Dios rextojṅni. ⁶ Colgudeed

loj gunaaga sigajc ni badeedni lojreni. Colquijx loj gunaaga tio'pli huält lo ni bejnni laani. Nen co'p cadre badeedni gu' bejn (te trabajw ni bateedni bejn), lagajc nenga colyejn te ni najc tio'p huält maazru fuert yä gunadxabga, nalajznu tedni trabajw tio'p huält. ⁷ Lacti gulä'p gunaaga xpala'nni, gubajnni si'ctis ni rlanjni lo guedxliuj. Naj colguteed gunaaga trabajw, si'cti mediid ni gulä'pni xpala'nni; si'cti mediidza ni bibalaznajni mood ni gubajnni, sigajcza gac-huin lastooni sa'csi bejnni xhigab nen lastooni: “Narä sobga'ä ree si'c te rein, te benroduxh, dina gacä biuud, niclaza gac-huin lazä.” ⁸ Ni'cni tejsi dxej sijb yejcn guiraa replaag xten Dios: yälgujt, yälhuin lajz, näj yälrliaan, luxh sejczeni lo balguiboo, sa'csi rnibeduxh Dad Dios ni gun xcälgujhtisni.

⁹ Guiraa rereii lo guedxliujre ni bennäj gunaadxabga cosgujdx, reni cuansanäjnini, sonduxhreni, siaduxhreni che fiireni gujxh ni carii cadre cayejcn. ¹⁰ Zijtru sisiujreni sa'csi rdxejbreni replaag xten gunadxabga, dxejc siniizareni:

—Aii, aii, riaduxhnu guedxrore, Babilonia, guedxdipduxh gujclu, luxh chela gucbeenu, ala bidzujn yälgujhtis yejclu.

¹¹ Rebejn ni ruto' loj guedxliuj sonduxhreni, siareni guejdxga sa'csi rutru rsiidi xhixtenreni ni ruto'reni. ¹² Laareni ruto'reni oor, pla't, guiraloj reguisa'c, perl, ladlin, ladmuraad, ladseed, näjza guiraloj baräjd yagdoo, näj guiraloj cos saru, ni nacchee läi elefant, näj cos saru ni nacchee bronz, näj guiib, näj márm, ¹³ näjza caneel, guiraloj laj comiid, näjza yalnejh, näj perfum, näjza yaal, näjza bin, näjza se't oliib, näjza arinsa'c, näjza triuu, näjza gon, näjza rexiil, näjza cabaii, näjza gare't, näjza bejn ni ruto'reni tiejxhreni, xaimreni. Guiraa reni'c ruto'reni.

¹⁴ Dxejc guniiza xse' ni canii xhaguibaali, najni:

—Ninexhsa'c ni rlazduxhlu, agunitloj. Guiraa recossa'c, recossaruduxh agubicajreni lojtu, luxh di gacdiru guidxäl bejn reni'c.

¹⁵ Reni ruto' giraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, sonduxhreni, sac-huinuxh lajzreni, ¹⁶ säjbreni:

—Aii, aii, riaduxhnu guedxrore, nani gojtni ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl, ¹⁷ tera'tbäztis baralii recosro ni najc xhixtenni, guxhijnreni.

Guiraa recapitán xte barcw, näjza guiraa remarineer, näjza rebejn ni rij biaj lo rebarcw näjza guiraa reni rujn dzuun lo nisdoo, gusujreni zijt, ¹⁸ näjza laareni cahuiireni cayäjs gujxh guejdxga, cabedxa'reni, caniiireni:

—¿Xhi stee guejdx najc si'c najc guedxrore, ä?

¹⁹ Bachajreni yuyol yejcreni sa'csi rac-huin lajzreni, binduxhreni, guredxa'reni:

—¡Aii! ¡Aii! Riaduxhnu guedxro sa'csi xcuenttis guedxduxhre gujc ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijn guedxrore.

²⁰ Guniiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguhxhtis xcuent ni bejn lojtu.

²¹ Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni. ²² Diru guibi' jiejn cayel nez xladcaiiilu reharp, reflaut, retrompe't; diru

guibi' chu tej ni gun xhitis dzuun; diruza guibi' chubej molin ni cayo't. ²³ Diru guibi' jien xcälrdimbicha' te bajl ni cagusani; diruza guibi' jiejn xse' bi'n näj dxa'p loj te sa' sa'csi rexpejnlu ni ruto' gujcreni beñroduxh lo guedxliuj sa'csi basguezalu reben guedxliuj xcuent rextzundxablu.

²⁴ Nen guejdxga bidxäjlza xtiejn renani gunii xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

19

¹ Che gulujx recosre, biejn diagä lascanu xse' xhidalro bejn ni canii xhaguibaa, cayäjpreni:
¡Colguiliä'p xpala'n Dios!

Xtenti Dios, xtenni najc yälrusläa lo dojl,
näj yälrdimbicha', näj yälmilagwr.

² Sa'csi xcälguxhtisni najc ganax laaca,
huentis najcni, sa'csi abejnni yälguxhtis gunadxabga nani
caguxhin reben guedxliuj xcuent xcälñadxabni.

Abejn Dios yälguxhtisni,
agudijxhni xcuent xtiejn rexpejn Dios ni baxhe' gunadx-
abga, che bagu'tnireni.

³ Guibi' guniizareni:

—¡Colguiliä'p xpala'n Dios! Gujxh xten gunadxabga sanuutis cayä'p par tejpas.

⁴ Guiraa regalbitajp rebengool näjza guidap remanba-
jnga bazuxhijbreni, biabrojreni gojnreni Dios ni rbej lo
tron cadro rnibeeni, caniireni:

—Sugacni si'c. ¡Colguiliä'p Xpala'n Dios!

⁵ Dxejcti nez lo tron cadro rnibee Dios biejn xse' tej ni
carii:

Colgudeed xquixtios lo Dios,
guira'tu ni rujn xtzuun Dios,
guira'tu ni rajntu Dios, rebenro sigajc rebennadolajz.

Sa' xten Xiil xten Dios

⁶ Dxejcti bejn diagä ascanu xse' xhidalduxh bejn, riejnni si'c che cayäjt nisro xhidajl gueu, näjza si'c che caguidxaduxh guzii, caniireni:

¡Colguiliä'p xpala'n Dios!

Sa'csi Gueb Dios, Dad xtenu ni rajp guiralii yälrnibee, ani acanibee.

⁷ Guibalajznu, guibalazduxhnu, guiliä'pnu xpala'nni sa'csi abidzujñ dxej guchnaa Xiil xten Dios, aguzucheeza dxa'p.

⁸ Abadeedreni ladliñ ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsä'c ni bejn rexpejn Dios.

⁹ Najza anglga loä:

—Bacuaa diidxre: “Chicbaa renani bidonñ jiääd lo xsa' Xiil xten Dios.”

Guniizani loä, najni:

—Rediidxre najc didx-guliipac xten Dios.

¹⁰ Dxejcti bazuxhibä lojni te ganäni, dxejc laani najni loä:

—Na'c gunlu si'c, sa'csi narä nacä sigajc najclu, nacä te ni rujn xtzuun Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios rudeed gusule' bejn xcuent Jesucrist, gusule'zarenı xtidx Dios.

Nani bijb te cabainol

¹¹ Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxguluii. Entis laaca rujnni yälguxhtis, entis laaca rucuaani che rujnni guer. ¹² Rebalojni rbebajl, yejcnı yu' xhidalduxh coronñ, luxh caj te laj lojni nani rutliidi racbee, luxh laatisni racbeeni xhi sälojni. ¹³ Najcwnı te lajd ni nadiini rejn; lajni najcza Xtidx Dios. ¹⁴ Guiraa resoldaad guibaa xten Dios siädnajlnı najcwrenı ladnol,

ladnaya, bijbzareni cabainol. ¹⁵ Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguiib. Sujnzani yälguxhtis loj reni rdexchlajz lo Dios, si'c ruläjreni yec uub che rbääreni bin, si'c sujnza Dios ni rajp guiralii yälrnibee. ¹⁶ Lo xhajbni nājza cuä' cujdni caj lajni: “Reii xten rereii, Dad xten redad.”

¹⁷ Bahuiä loj te angl suga'ni galäii gubijdx, cabedxa'ni caniini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios; ¹⁸ te gautu xpääl rereii, nājza xpääl recapitán, nājza xpääl rebenro, nājza xpääl recabaii, nājza xpääl renani rbijb recabaii, nājza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuun bejn, rebenbáz sigajc rebenro.

¹⁹ Dxejcti bahuiä loj manro nājza loj rereii guedxliuj, abire'reni te gucuanäjreni nani rbijb cabainol nājza guiraa resoldaad xtenni. ²⁰ Biga' manroga nājza profetxhii ni bejn senro nez loj manroga te basgueeni guiraa renani cua' seen xten manroga, nājza renani bazuxhijb lo banäjb xten manroga. Guiro'p redee bacuaareni guideb naba-jnreni neņ te bal guiboduxh ni recnäj sufr. ²¹ Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

20

Te mił ijz

¹ Dxejcti bahuiä loj te xangl Dios ni siädjiäjt xhaguibaa, siädnäni liäii ni ruxhal guedro ni laa gabijl. Ca'zani te cadenro. ² Anglre gunaaz gutiatzroga, ni gujc bäl galooli, ni najcza benđxab, ni laaza Satanás. Bacuaduunini te mił ijz. ³ Basäl'nini neņ gabijl, te ro'c basäunini, bacuaani liäii

te na'cru gusgueeni reben̄ guedxliuj laḷ ni guiza' te miḷ ijz. Che guiza' reijzga, empac sibi' ḷasacni bale'si dxej.

⁴ Dxejc bahuiä retron̄ cadro rbejreni rnibeereni, bahuiäza loj renani rbej lo retron̄, cua'reni yäl̄rnibee te gunreni yäl̄guxhtis. Dxejcti bahuiä xaim rebejn̄ nani biru' yejcn̄i sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo ḷaareni. Gubansacreni loj rebengut, gurenäjreni Jesucrist te laani gunibenäjreni te miḷ ijz. ⁵ Dee najc yäl̄rbansac galoo lo rebengut. Niluxh stecuaa rebengut, direni guibansac che guisa'li te miḷ ijz. ⁶ Chicbaa rebejn̄ nani guibansac ganiddoo, najcreni bendxan ni agubicaj xtojlreni. Ni rojp yäl̄gujt di guidzujn̄ lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te miḷ ijz.

⁷ Che guiza' te miḷ ijzga, susḷasacni Satanás neḷ gabijl. ⁸ Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben̄ Gog näjza reben̄ Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo. ⁹ Huä'preni lo te camp cadro gulagduxh. Gudäjyreni guideb gabig cadro rnibee rexpejn̄ Dios neḷ guejdx nani sanälajz Dios. Per baxhaḷ Dios bal guiboo xhaguibaali bitejbni, te guyejc guiragajcreni. ¹⁰ Dxejc bacuaareni bendxab nani biädgusguee rebejn̄ lo bal guiboo ni cayecnäj sufr, lagajc cadro yu' manro, näjza profetxhii nani basguee; lo bal guibooga susacsírenini sidejdreni trabawduxh dxej-yääl par tejpas.

Yäl̄guxhtis ni gujc nez loj tron̄ronol

¹¹ Dxejcti bahuiä lo te tron̄ronol näjza lo nani sobga' lojni te rujnni yäl̄guxhtis. Nez lojni gunitlojli guedxliuj näjza guibaa, xhetru lajtdi bidxäjl par laareni. ¹² Bahuiä

lo rebengut, benro sigajc bennadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcäl nabannäj Dios par tejpas. Dxejcti bejn ni yäl gutxhtis rebengut xcuent ni bejnreni, xcuentza rediidx nani caj loj reguijtzga. ¹³ Guiranejz biääd rebengut: nisdoo batzuug rebengut ni yu' lojni, gabijl näjza yälgujt batzuugza rebengut ni yu' lojreni. Dxejcti bejn Dios yälgujhtis tejpgareni xcuent ni bejnreni. ¹⁴ Dxejcti bacuaani yälgujt näjza gabijl lo bal guiboo ni najc si'c te nisdoo te ro'c checreni par tejpas. Dee najc yälgujt ni rojp. ¹⁵ Guiraa bejn ni di lajni nidxäjł lo xlibr yäl nabajñ bacuaazani reni'c lo bajlga.

21

Xhaguibacoob näjza guedxliucoob

¹ Dxejcti bahuiä te xhaguibacoob näjza te guedxliucoob, sa'csi agunitloj guibabiejw, näjza guedxliubiejw, luxh xhettiruzä nisdoo. ² Narä Juan, bahuiä lo guedx Jerusalencoob, guedxdxan, siädjiäjtni xhaguibaali cadro rnibee Dios. Sucheduxhni si'c rsiuchee te dxa'p nani agojl guchnaa. ³ Dxejcti biejn diagä te xse' te ni canii dipduxh, ascanu lo tron cadro rnibee Diosli carii se'ga, scree caniini:

—Colhuii, aguzuj xquidoo Dios galäii rebejn, anabannäj Dios rebejn, sajczareni rexpejn. Sibannäj lagajc Gueb Diosreni. ⁴ Sutia Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirureni jiajn, sa'csi guiraa redee ni guyu' galoo agunitloj.

⁵ Dxejcti ni sobga' lo tron cadro rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipacreni, sajc chalilajz bejn rediidxre.

⁶ Dxejcti najzani loä:

—Agujcti. Narä nacä A näjza Z, ni säloj nani rbaxtiej näjza nani ruluux. Lo chutis ni cayojl, sudedxlia'ä nis yäni, nalajznu yälñabajñ par tejpas. ⁷ Chutis nani gun gaan lo dojl, sica'zani guiraa dee si'c yälñasa'c, luxh narä sacä Xtiosni, laani sacni xi'nä. ⁸ Niluxh renani rdxejb, renani di chalilajz xtidxä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhijb lo banäjb, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadre rejc guiboo näjza sufr par tejpas. Dee ni najc yälgujt ni rojp.

Guejdx Jerusaléncoob

⁹ Dxejcti lo guigajdz xangl Dios ni ca' guigajdz xhijg ni guidxa guigajdz reyälguhtis xten Dios, birii tejni, najni loä:

—Gudaa, te guluiä lojlu dxa'p nani guchñaa Xiil xten Dios.

¹⁰ Dxejcti bejnii gunixcajä, huinäni narä lo te danro ni jiaduxh, ro'c baluiini loä te guedxro, te guedxdxan ni laa Jerusalén, luxh xhaguibaali siädjiäjtñi nez lo Dios. ¹¹ Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr. ¹² Guideb gabi guejdxga dejd te paderro cadre caj tzubitio'p xportoroni. Te angl xten Dios suga' ro' tejga portonga. Loj tejga portonga, caj laj tej retzubitio'p cuaa xten rexpeljñ Israel. ¹³ Chon portonga caj nez cadre rliejn gubijdx, yu'za chon portonga nez ladbee, yu'za chon portonga nez ladbäiw, yu'za chon portonga cadre räaz gubijdx. ¹⁴ Yu' tzubitio'p guiro lo cimient xten guejdxga. Lo tejga reguijga caj laj tej retzubitio'p apost xten Xiil xten Dios.

¹⁵ Angl ni caninäj narä ca' si'c te biquii ni najc ganaxduj oor te gurejxhni guejdxga, näj reportonga, näjza padeerga. ¹⁶ Guejdxga najc cuadraad: sigajc ni siolni, sigajcza ni gulajgni. Dxejcti cua'ni biquii barejxni guejdxga, barejxni tio'p mil' tio'p gayuu kilómetros tejga laad. Sigajc siolni, sigajcza gulajgni, sigajcza jiaani. ¹⁷ Dxejcti barejxni padeerga, yu'ni gayonbitajp metr segun mediid xten bejn, sa'csi ni'c najc ni cagutiexhnäjza anglga.

¹⁸ Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn. ¹⁹ Recimient xten padeerga nac-chee guisa'c. Guiganid najc guijaspe; ni rojpga najc zafiro; ni riojnga najc ágata; ni rdajpga najc esmeralda; ²⁰ ni rgaiiga najc onix; ni rxho'pga najc cornalina; ni rgajdzga najc crisólito; ni rxhujnga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubitio'pga najc amatista. ²¹ Guitzubitio'p portonga najc tzubitio'p perl. Tejga portonga guc-chee tej perl. Nezyuro ni rdeed galäii guejdxga najc ganaxduj oor, rienni si'c te guihuajn.

²² Dina nuhuiä nicla tej guidoo nen guejdxga, sa'csi suga' Gueb Dios ni rajp guiralii yälrnibeduxh, näjza Xiil xten Dios. Laani najc xquidoo guejdxga. ²³ Guejdxga dini guiquiin gusanij nicla gubijdx niclaza bäii, sa'csi lagajc xcälrdimbicha' Dios näjza Xiil xten Dios ruzanij ro'c. ²⁴ Rebejn guedxliuj ni rililajz xtidx Dios sajc sarení lo bianijga, luxh rereii ni siäd lo guedxliujre siädnäzarení xcälrnibeerení, näj xpala'nrení ro'c. ²⁵ Di ro' reportanga jiäuu rdxej, luxh ro'c xhettiza yäl. ²⁶ Ro'c chanäzarení yálnasa'c näj xpala'n reguejdxro ni yu' lo guedxliuj. ²⁷ Niluxh di gacdipac jiu' nicla tej cosguijdx ro'c, niclaza te bejn ni rujn cosguijdx näj yälrusguee. Ro'c siu' ganaxduj renani caj lajni lo libr xten yäl nabajn par tejpas nani ca' Xiil xten Dios.

22

¹ Dxejc baluii anglga te gueuro loä, cadre yu' nisyä xten yäl_nabaj_n. Rdimbicha'ni si'c te guihuaj_n, luxh cariini lo tron cadre rnibee Dios näjza Xiil xten Dios, ² rdej_ni loj nezyujro ni rdej_n galäi guejdxga. Guiro'p laad gueuga sojb reyajg xten yäl_nabaj_n, lojreni rcäj tzubitio'p cuaa ninejxh ne_n tebijz, tejga cuaani tejga bäi; luxh rebalajg ni rcäj lo reyajgga najc te gusiaj_ni rebe_n guedxliuj. ³ Dxejcti ro'c xhettiru yälrdzubde, sa'csi ro'c yu' tron cadre rnibee Dios näjza Xiil xten Dios, ruzuxhijbza rexpej_ni, raj_nreni laareni. ⁴ Suhuiireni lojpacni si'cpac ni najcni, sicajza laj Dios lo cuajreni. ⁵ Ro'c diru yääl chu. Luxh reni rbäjz ro'c di guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjrenini par tejpas.

Säddzungajxh dxej ni guibisac Jesucrist

⁶ Dxejc naj anglga loä:

—Guliipac najc rediidxga, sajcpac chalilajzlureni. Dad Dios lagajc nani basniib lastoo rebej_n ni gunii xtiidxni agujc xchero, lagajc laani baxha_ni xanglni te baluilojni loj rexpej_ni guira'ti nani agojl gac.

⁷ —Sajngalu gan, siojb jiäla. ¡Chicbaa nani riu rediidx ni caj lo librré!

⁸ Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangl Dios nani baluii loä guiraa redee. ⁹ Luxh laani najni loä:

—Na'c gunlu si'c, sa'csi narä runä xtzuunni sigajc rujnluni, sigajc rujn rebej_n ni gunii xtidx Dios agujc xchero, sigajc rujn rebej_n ni rusoob rediidx ni caj lo librré. Bazuxhijb loj Diostis.

¹⁰ Dxejc najni loä:

—Na'c gusäuulu guijt_n cadre caj rediidxre xcuent nani churu gac, sa'csi asiäddzungajxh redxej ni chale'reni.

¹¹ Luxh la_l ni guidzuj_n dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujn dzunsa'c, chanuu gunreni dzunsa'c, nani najcza bennaya, si'cza chanuu gacni bennaya.

¹² Gunajtiro:

—Siojb jiälä, luxh siädnaä xhi gunidxä loj tejgatu si'c ni riäjl xca'tu xcuent dzuun ni bejntu. ¹³ Narä Jesucrist nacä si'c najcza A näjza Z, ni säloj nani rbäxtiej näjza nani ruluux.

¹⁴ 'Chicbaa renani riu xtidx Dios, najcreni si'c ni rguiib xhajnreni te sajc jiu'reni nez porton xten guejdxga, sajcza gauni ninejxh ni caj lo yajg xten yäl_nabaj_n par tejpas.

¹⁵ Per dejtz guejdxga chajia'n reni najc si'c bä'cw, nalajznu rebidxaa, renani rusguee chälbejn, renani rugu't sa'reni, renani ruzuxhijb lo rebanäjb, näjza ni rchaglajz rnii didx-xhii te gusgueeni.

¹⁶ 'Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä nen reguidoo loj rexpenä. Narä nacä te xajg toreii David, nacäza si'c balxhaguibaa nani rdimbidxa' cäjysi che gajd jianij lo guedxliuj.

¹⁷ Sprit D_xan xten Dios näjza chääl Xiil canii, najreni:

—Co_ltaa.

Suguiniiza nani riejn diajgreni diidxre, gäbreni:

—Co_ltaa.

Sujiäädza chutis ni cayojl, sujiädya_xlia'ni nis yäl_nabaj_n par tejpas.

¹⁸ Sa'csi narä rniliä'ppac lojtu, guiraatu ni riejn diajgtu rediidx ni caj lo guijtze xcuent recos ni churu gac, palga yu' chu tejt_u gutajlr_u diidx ni caj guijtze, suteedru Dios bejn_{ga} replaag yej_cni loj ni caj lo guijtze. ¹⁹ Palga yu' chu gudzucaj loj rediidx ni caj lo guijtze, sudzucajza Dios nani

nica'ni lo yajg xten yäl̄nabaj̄n par tejpas, näjza lo guedx
Dxan, ni caj xcuentreni lo guijtze.

²⁰ Nani cagusule' diidx xcuent guiraa redee guniini,
najni:

—Guliipacni siojb jiälä.

Sugacni si'c. Gudaad Dad Jesucrist.

²¹ Sujiääd xcäl̄racnäj Dad Jesucrist lo guiraatu. Sugacni
si'c.

Xtidxcoob Dios ni biändä dad Jesucrist **New Testament in Zapotec, Mitla (MX:zaw:Zapotec, Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
